



**Ordinaziun per il diever dallas
vias d'alp, da funs e d'uaul
cun vehichels a motor**
per la vischtaunca Lumnezia

Cuntegn

1. Vias d'alp, da funs e d'uaul	3
Art. 1 Scamonds da carrar, restricziuns da traffic ed ordinaziuns	3
Art. 2 Vias senza scamonds ni restricziuns da carrar	3
Art. 3 Vias cun scamonds ni restricziuns da carrar	3
2. Lubientschas excepziunalas da carrar	3
Art. 4 Excepziuns vias d'alp, vias da funs e vias d'uaul che surveschan buca sulettamein al diever forestal (vias blauas e vias 18t)	3
Art. 5 Excepziuns vias d'uaul che surveschan principalmein al diever forestal (vias cotschnas e vias 18t)	4
Art. 6 Lubientschas extraordinarias	4
Art. 7 Taxas	5
3. Prescripziuns specialas ed execuziun	5
Art. 8 Prescripziuns specialas	5
Art. 9 Responsabludad	5
Art. 10 Disposiziuns penales	5
Art. 11 Execuziun	6
Art. 12 Publicaziun e signalisaziun	6
4. Disposiziuns finalas	6
Art. 13 Dretg da recuors	6
Art. 14 Entrada en vigur ed abrogaziun dil dretg vertent	6

Ordinaziun per il diever dallas vias d'alp, da funs e d'uaul cun vehichels a motor

digl 1. d'october 2018 (versiun digl 1. da schaner 2019)

La suprastonza communal,

sebasond sin art. 3 dalla lescha davart il traffic sin via (RS 741.01), art. 7 ed 8 dalla lescha introductiva tier la lescha federala davart il traffic sin via (DG 870.100), art. 15 dalla lescha davart igl uaul (RS 921.0), art. 13 dall'ordinaziun davart igl uaul (RS 921.01), art. 34 dalla lescha cantunala davart igl uaul (DG 920.100) ed art. 26 entochen 28 dall'ordinaziun cantunala davart igl uaul (DG 920.110),

concluda

1. Vias d'alp, da funs e d'uaul

Art. 1 Scamonds da carrar, restricziuns da traffic ed ordinaziuns

¹ Per il carrar cun vehichels a motor sin las vias d'alp, da funs e d'uaul sin territori dalla vischernaunca Lumnezia valan las signalisaziuns montadas tenor la lescha davart il traffic.

Art. 2 Vias senza scamonds ni restricziuns da carrar

¹ Las vias d'alp, da funs e d'uaul senza scamonds ni restricziuns da carrar han la funcziun da vias communalas e stattan a disposiziun al traffic cun vehichels a motor.

Art. 3 Vias cun scamonds ni restricziuns da carrar

¹ Las vias d'alp, da funs e d'uaul cun scamonds ni restricziuns da carrar surveschan principalmein all'agricultura ed all'economia forestala. Ei astga vegnir fatg diever da quellas vias cun vehichels a motor sulettamein per intets ch'ein stipulai ellas leschas surordinadas davart igl uaul ed en art. 4 e 5 da questa ordinaziun.

2. Lubentschas excepziunalas da carrar

Art. 4 Excepziuns vias d'alp, vias da funs e vias d'uaul che surveschan buca sulettamein al diever forestal (vias blauas e vias 18t)

¹ Ils suandonts viadis ein excepziun dils scamonds ni dallas restricziuns da carrar sin las vias d'alp, vias da funs e vias d'uaul che surveschan buca sulettamein al diever forestal e basegnan negina lubentscha dalla vischernaunca:

- a) tut ils viadis da survetsch dalla polizia, dil survetsch forestal, dils guardiacatscha, dalla sanitad, dils pumpiers, dil militar e schurmetg civil, viadis per ademplir activitads ufficialas ni legalas (p.ex. spazzatgamin, inspecziun cumissiun da fiug, dertgiras per uatgas e.a.v.) sco era viadis en survetsch da confederaziun, cantun e vischernaunca
- b) viadis da miedis e da veterinaris en activitat professiunala
- c) viadis che vegnan ordinai d'in post cumpetent a caschun d'accidents, d'incendis e da catastrofas
- d) viadis per ademplir mesiras da protecziun encunter eveniments dalla natira
- e) viadis per il manteniment da reits da conducts dils survetschs da telecommunicaziun e da reits da distribuziun d'energia
- f) viadis pil transport da selvaschinas d'ungla fessa sittadas
- g) viadis per cargar e scargar las alps, visetas d'animals en cass da malsogna ni accident
- h) viadis per diever dall'agricultura cun maschinas agricolas

- i) viadis per diever dall'agricultura cun vehichels a motor buca agricols entochen ina peisa totala da 18 tonnas e viadis tier baghetgs d'agricultura principals che fuorman in menaschi puril entochen ina peisa totala da 28 tonnas
- j) viadis per diever dil forestalessor ord igl uaul public entochen ina peisa totala da 28 tonnas
- k) viadis per transports da lenna ord uauls privats sco lenna da sort, da diever, d'ingant e.a.v. entochen ina peisa totala da 18 tonnas
- l) viadis tier igl agen domicil ni l'atgna fatschenta entochen ina peisa totala da 18 tonnas
- m) viadis da proprietaris, affittaders e locataris per igl access tier lur schischom entochen ina peisa totala da 18 tonnas
- n) vehichels a motor da furniturs, da glieud da professiun e da concessiunaris per praticar lur activitat entochen ina peisa totala da 18 tonnas
- o) vehichels da persunas impedidas dad ir a pei
- p) vehichels per far visetas a pasturs, gidar a far fein.

Art. 5 Excepziuns vias d'uaul che surveschan principalmein al diever forestal (vias cotschnas e vias 18t)

¹ Ils suandonts viadis ein excepziuns dils scamonds ni dallas restricziuns da carrar sin las vias d'uaul che surveschan principalmein al diever forestal e basegnan negina lubientscha dalla vischnaunca:

- a) tut ils viadis da survetsch dalla polizia, dil survetsch forestal, dils guardiacatscha, dalla sanitad, dils pumpiers, dil militar e schurmetg civil, viadis per ademplir activitads ufficialas ni legalas (p.ex. spazzatgamin, inspecziun cumissiun da fiug, dertgiras per uatgas e.a.v.) sco era viadis en survetsch da confederaziun, cantun e vischnaunca
- b) viadis da miedis e da veterinaris en activitat professiunala
- c) viadis che vegnan ordinai d'in post cumpetent a caschun d'accidents, d'incendis e da catastrofas
- d) viadis per ademplir mesiras da protecziun encunter eveniments dalla natira
- e) viadis per il manteniment da reits da conducts dils survetschs da telecommunicaziun e da reits da distribuziun d'energia
- f) viadis pil transport da selvaschinas d'ungla fessa sittadas
- g) viadis per cargar e scargar las alps, visetas d'animals en cass da malsogna ni accident
- h) viadis per diever dall'agricultura cun maschinas agricolas
- i) viadis per diever dall'agricultura cun vehichels a motor buca agricols entochen ina peisa totala da 18 tonnas e viadis tier baghetgs d'agricultura principals che fuorman in menaschi puril entochen ina peisa totala da 28 tonnas
- j) viadis per diever dil forestalessor ord igl uaul public entochen ina peisa totala da 28 tonnas
- k) viadis per transports da lenna ord uauls privats sco lenna da sort, da diever, d'ingant e.a.v. entochen ina peisa totala da 18 tonnas

² Sin las vias d'uaul che surveschan principalmein al diever forestal conceda la vischnaunca ina lubientscha da carrar en fuorma d'ina vignetta per:

- a) viadis tier igl agen domicil ni l'atgna fatschenta entochen ina peisa totala da 18 tonnas
- b) viadis da proprietaris, affittaders e locataris per igl access tier lur schischom entochen ina peisa totala da 18 tonnas
- c) vehichels a motor da furniturs, da glieud da professiun e da concessiunaris per praticar lur activitat entochen ina peisa totala da 18 tonnas
- d) vehichels da persunas impedidas dad ir a pei
- e) vehichels per far visetas a pasturs, gidar a far fein.

Art. 6 Lubentschas extraordinarias

¹ La suprastonza communal sa conceder sin damonda a secret lubentschas extraordinarias per singuls tschancuns da vias en cass specials, occurrentzas, fiastas popularas e.a.v.

Art. 7 Taxas

¹ Per las lubientschas da carrar vegn incassau las suandontas taxas:

- | | | |
|----|---|--------------------|
| a) | lubientscha per in onn per vehichels tochen 3.5 t | CHF 50.00 |
| b) | lubientschas per in gi per vehichels tochen 3.5 t | CHF 10.00 |
| c) | vehichels a duas rodas pagan la mesadad dallas taxas sura | |
| d) | lubientscha per in onn per vehichels naven da 3.5 t tochen 18.0 t | CHF 500.00 |
| e) | lubientscha per in'jamna per vehichels naven da 3.5 t tochen 18.0 t | CHF 100.00 |
| f) | lubientscha per tschancuns da via limitai | CHF 50.00 - 500.00 |

² Per vehichels a motor sur 18.0 tonnas, numnadamein per camiuns, vegn ei concediu neginas lubientschas annualas. Lubientschas temporaras per tschancuns da via limitai vegnan concedidas sin damonda per vechichels entochen ina peisa maximala da 32.0 tonnas. Supplementarmein tier la taxa da lubentscha tenor art. 7 al. 1 lit. f da questa ordinaziun sa la vischnaunca incassar a norma dalla stabilitad dalla via, dalla frequenza da viadis, dalla lunghezia dalla via duvrada e dalla peisa totala dil vehichel ina contribuziun per metter en uorden la via. La vischnaunca Lumnezia ei deliberada da pagar las taxas da lubentscha per agens projects e lavurs da manteniment che pertuccan las vias d'alp, da funs e d'uaul.

³ La lubentscha dil gi vala per ir e turnar. Ella ei valeivla maximalmein 3 gis naven dil datum d'emissiun.

⁴ La lubentscha dall'jamna per vehichels naven da 3.5 tonnas tochen 18.0 tonnas ei valeivla maximalmein 7 gis naven dil datum d'emissiun. Il diember da viadis ei buca limitaus enteifer il temps da valeivladad.

⁵ La lubentscha per in onn ei sulettamein valeivla per igl onn calendar, el qual la lubentscha vegn retratga. Il diember da viadis ei buca limitaus enteifer il temps da valeivladad.

⁶ La lubentscha vegn concedida per il vehichel ed ei da pazzar bein veseivla vid quel. Ella ei buca transmissibla.

⁷ Las lubentschas vegnan emessas entras l'administraziun communalia.

3. Prescripziuns specialas ed execuziun

Art. 8 Prescripziuns specialas

¹ La suprastonza communalia sa scumandar tut ils viadis cun vehichels a motor en cass da relaziuns disfavoreivlas dallas vias ni relaschar restricziuns per in cert temps ni per certas categorias da vehichels.

² Barrieras, principalmein el territori d'alp, ein da serrar suenter scadin passadi.

³ Dil territori cunfinont allas vias astga ei buca vegnir fatg diever cun vehichels. Parcar e cruschar astga succeder sulettamein en loghens adattai persuenter.

Art. 9 Responsabladad

¹ En cass da donns ni accidents ei la vischnaunca mo responsabla el rom da garanzia sco proprietari dalla via.

² Duront igl unviern vegnan las vias d'alp, da funs e d'uaul per la gronda part buca rumidas. Vegn ei tuttina carrau sin las vias, succeda quei sin atgna resca.

Art. 10 Disposiziuns penales

¹ Surpassaments dallas prescripziuns davart il traffic sin via vegnan puni entras ils funcziunaris communals ni tiarzas persunas incarcadas tenor la procedura da multas disciplinarias.

² Igl abus dalla lubentscha sa haver sco consequenza la privaziun permanenta ni temporala da quella.

Art. 11 Execuziun

¹ L'execuziun da questa ordinaziun ei caussa dalla suprastonza communal. Ella sa delegar quella cumpetenza ad in ufficial ni funcziunari communal sco era a tiaras persunas.

Art. 12 Publicaziun e signalisaziun

¹ Las excepcions e las restricziuns da traffic ch'ein vegnidas relaschadas cun questa ordinaziun ein da publicar. La signalisaziun ha da succeder en cunvegnentscha cun la polizia cantunala da traffic.

4. Disposiziuns finalas

Art. 13 Dretg da recuors

¹ Recuors enviers decisiuns dalla suprastonza communal ein d'inoltrar en secret enteifer 30 gis alla dertgira administrativa dil cantun Grischun.

Art. 14 Entrada en vigur ed abrogaziun dil dretg vertent

¹ Questa ordinaziun va en vigur cun igl 1. da schaner 2019.

² Cun l'entrada en vigur dalla presenta ordinaziun vegnan tut ils conclus da vischnaunca ch'ein cuntradictoris a questa ordinaziun abrogai, specialmein ils reglements per far diever dallas vias d'uaul cun vehichels a motor dallas anteriuras vischnauncas.

Approbau dalla suprastonza communal a caschun da sia sesida digl 1. d'october 2018

Il president communal

Duri Blumenthal

Igl actuar:

Marcus Cavegn